

499881P

DISSERTATIO INAUGVRALIS MEDICA,
DE
REVULSIONE
ET
**REMEDIIS REVEL-
LENTIBVS,**

QVAM
AVCTORITATE ET CONSENSV
GRATIOSI MEDICORVM ORDINIS,
SVB PRÆSIDIO
DN. D. HERM. PAVLI JVCHII,
SACRI PALATII CÆSAREI COMITIS, FACVLT. MED. H. T. DECANI AC SENIORIS,
ET PATHOL. ATQVE PRAX. PROF. PVBL. ET ASSESSORIS PRIMARIJ,
SERENISS. SAXON. DVC. VINARIENSIS ET GOTHANI CONSILIARIJ
AVLICI ET ARCHIATRI, NEC NON ACAD. CÆSAR. NAT. CVRIOS.
COLLEGAE,

PATRONI ET PROMOTORIS SVI COLENDISSIMI,
PRO GRADV DOCTORIS
SVMMISQVE IN ARTE SALVTARI HONORIBVS
ET IMMVNITATIBVS

LEGITIME IMPETRANDIS,
PVBLICO ERVDITORVM EXAMINI SVBJICIT
AVCTOR ET RESPONDENS

JO. FRIDER. WILH. STORCH,
ISENACENSIS.

HORIS CONSVETIS IN AVDITORIO MAJORI
COLLEGII MAJORIS
DIE VII. SEPTEMBRIS, MDCC XLIII.

ERFORDIÆ, Typis HERINGII, Acad. Typogr.

RECEIVED

RECEIVED

RECEIVED

RECEIVED

RECEIVED

RECEIVED

RECEIVED



Q. D. T. O. M. B. V.

§. I.



E revulsione & revellentibus ut reme- *Vocum re-*
 dio & auxilio in arte medica utilissimo *vulsionis &*
 & necessario, sub auspicio Dei, acturus, *revellenti-*
 primum & primarium nec superfluum *um etymo-*
 esse reor, etymologiam vocum eorum, *logia, syno-*
 que significationem enucleare. Multa *nymia. &*
significatus.

quidem nomina rebus improprie imposita esse viden-
 tur, plurima vero optime quadrant, & sensum non
 inconvenienter exprimunt: quod & de revulsione &
 revellentibus valet, quæ pro nominibus compositis
 ex præpositione re, vel per apocopen ex retro zurück,
 & verbo vello reissen, zupffen, habenda. Cum vero
 nomina sint signa rerum, hinc revellere vel retrovel-
 lere idem quod retrahere, revocare radicum aliquid
 iterum eradicare significat. Revulsio est actus, eradi-

cationis, retractionis, vel revocationis. Revellentia sunt media & instrumenta, quibus revulsio perficitur & impetratur. Græca lingua revulsionem exprimit per ἀντισπασιν, & revellentia per ἀντισπαστικά, a verbo ἀντισπάω, quod latine vertitur, retraho, contraho, attraho, contravello, revoco, avoco. Ufu receptum quoque est, ut ἀντισπαστικά & ἀντισπασμώτῃα pro synonymis habeantur. Hinc revellentium hæc conveniens est descriptio, quod sint media spasmi inhibentia, mitigantia, infringentia. Id quod evidenter apparet in congestionum revocatione; omnis enim congestio oritur ex spasmo vel contractione partium musculosarum in membris remotis, spasmo vero mitigato, congestio tollitur.

§. II.

Definitio revellentium, etiam secundum veteres.

Ex hac investigatione etymologica optime derivatur definitio, quod nempe revellentia sint media sive auxilia motum & congestionem sanguinis & humorum a loco periculoso sive a parte affecta nobili, in locum minus periculosum sive in partem remotam revocantia & retrahentia. Veterum definitio hæc est: ἀντισπασμώτῃα sunt auxilia in diversum revellentia; vel revellentia sunt media humorem fluentem in contrariam partem retrahentia & avertentia.

§. III.

Alia definitio strictior.

Quemadmodum autem humores propria vi ex una parte in aliam non fluant, multo minus ex partibus inferioribus ad superiores ascendere possunt: ita rationi

rationi consentaneum est, eorum congestionem fieri per motum tonicum partium solidarum, quæ in uno loco strictæ fluidum contentum exprimunt, & in partem laxam vel relaxatam congerunt. Hinc stricturæ spasticæ per quæcunque adminicula relaxatæ refluentes humores admittunt & in interstitia fibrarum recipiunt, sicque congestiones a partibus remotis revocant, & partes affectas ab infarctu liberant. Hinc dilucidior & compendiosior definitio erit, dum dicatur, quod revellentia sint remedia vel adminicula motum tonicum invertentia & mutantia.

§. IV.

Prius vero quam telam exordiar, remque ulterius prosequar, de antiquitate & usu revellentium mentionem faciam, quod ea quidem ab incunabulis *Revellentium antiquitas & usus.* medicinæ nota, interim tamen, ut alia medicamina & remedia, mutationi subiecta fuerint. Hippocrates eorum usum commendavit & ejus commentator Galenus plurimis in locis eorum adplicationem indicavit, qui vero nimia scrupulositate auctor est, ut ejus adsecræ per plurima secula methodum revulsoriam derivatoriae confuderint. Strictè Galenum sequentes medici, plurimis in affectibus revellentia laudarunt ad illud usque tempus, quo primum protulerunt circulum sanguinis. Ex eo enim tempore aliqui hæsitaverunt, & fere ut media inutilia rejecerunt, quorum vestigiis porro insistebant Cartesiani & Mechanici: alii vero, quamquam mechanismo inhærentes, usum eorum tamen commendarunt, & rationibus sufficientibus & per ex-

perientiam demonstrarunt; inter quos Baglivius de
 fibra motrice p. 340. sequentia profert: „Non obstan-
 „te continuo liquidorum circulo, dantur tamen revul-
 „siones & derivationes humorum in curatione morbo-
 „rum. Veritatem hujus confirmat quotidiana expe-
 „rientia. Garriant, quicquid velint, nonnulli delicatuli
 „ex schola Hypothesiatarum. Sed præter experien-
 „tiam Dominus Bellinus amicus noster, rationibus me-
 „chanico-geometricis idem evidentissime demonstravit
 „in libris de missione sanguinis ad ægrorum salutem
 „necessaria, qui quoque aliquot exempla practica pro-
 „ducit.

§. V.

*Pauci re-
 centiorum
 hanc rem
 pertracta-
 runt.*

Interea cum revulsione ac revellentium conside-
 ratio ad therapiam pertineat, miror, perpauca aucto-
 res hujus ævi ex professo de iis scripsisse. Mœbius
 in Institutionibus in medium profert quidem titulum
 de revulsione, in tractatione autem plane silet, & ne
 verbo quidem revulsionem attingit.

§. VI.

*Revellentia
 quomodo
 differant
 primo a de-
 rivantibus.*

Sepositam etymologiam & historiam, sequitur
 nunc *differentia revellentium*: In hac consideratione in-
 conspectum veniunt duo sed diversæ significationis
 termini, scilicet, *revellentia* & *derivantia*. De quibus
 supra jam mentionem feci, quod multoties inter se
 confundantur & unum pro altero adhibeatur.

§. VII.

Hæc decla-

Accipiamus pro schemate dilucidationis venæ se-
 ctionem.

tionem. Datur enim revulsoria, & derivatoria. V. *venatur ex*
 S. revulsoria est, quæ sanguinem in partem affectam *venæ sectio-*
 congestum a parte affecta in aliam partem remotio- *ne revulso-*
 rem revocat, ac retrahit: v.g. Si caput vel pectus af- *ria & deri-*
 ficitur, venæ sectio in pede nomen meretur venæ *vatoria.*
 sectionis revulsoriæ. Derivatoria autem venæ sectio
 est, quando vena secatur in loco parti affectæ proxi-
 mo, qua sanguis evacuator & elicitur, non vero re-
 vocatur nec revellitur. Ceterum hic conferri potest
 LAUR. BELLINI, Profess. celeberrimi Pisani tractatus
 de urinis, pulsibus, missione sanguinis &c. Proposit.
 VI. pag. 119. qui ita scribit: *Revulsio ac derivatio non*
sunt nomina prorsus inania, sed qui effectus per ipsam con-
tingunt, a sola diversa proportionē velocitatum, & quan-
titatum, qua sanguis dum mittitur, fuit per canales di-
versos, pendet non a tractione, aut qualibet alia causa.
 Idem Auctor l.c. p. 124. *Quarto revulsionis, aut, ac deri-*
vationis nomina non esse tam inania, quantum ab aliqui-
bus supponuntur; patet etiam ex his propositionibus, per
missionem sanguinis ex aliqua vena derivari ad partem ali-
quam, majorem quantitatem ejus intra datum aliquod spa-
tium temporis, quam si mitteretur ex alia: &c.

§. VIII.

Hippocrates satis dilucide hanc rem distinguit
 Libr. VI. Sect. VII. Aphor. 21. *Revellenda ea sunt, in-*
 quit, *quæ, quo non oportet, vergunt; sin autem, quonam* *Quæ proba-*
convenit, iis tum viam struere decet, quamnam in partem *tur ex di-*
singula tendunt. *His Hippo-*
 Hic aphorismus sufficienter demon- *cratis,*
 stratur, ubi venæ sectio derivatoria & revulsoria locum
 habeat.

habeat. Et alio loco Lib. de Natura humana Sect. III. p. m. 9. n. 10. Venæ sectionem disertis verbis monstrat. *Studendum est, ait, ut quam longissime a locis, in quibus dolores fieri & sanguis colligi consuevit, venarum sectiones fiant. Hac namque ratione cum minime magna derepente mutatio continget, tum etiam consuetudinem tollendo effeceris, ut ne amplius eodem colligatur.* In his unice V. s. revulsoriam commendat non vero derivatoriam: derivatoria enim consuetudinem congestionum auferre non valet. Rationi potius consentaneum est, ut derivatoria V. sectio consuetudinem magis inducat & pertinaciorē reddat. Hinc Hippocratis venæ sectio revulsoria nulla alia est, quam quæ longissime a parte affecta peragitur.

§. IX.

Galenus aliorumque circa venæ sectionem revulsoriam & derivatoriam errores.

Errant adeoque Galenus ejusque affectæ quam maxime, dum verba Aphor. 68. Sect. V. *parti capitis posteriori dolenti in frontem recta excurrens vena incisa prodest*: ita interpretantur, ac si hæc vena in fronte incisa, intuitu occipitis dolentis sit venæ sectio revulsoria. Ex hac interpretatione quam plurimi alii errores pendent, qui methodum revulsoriam derivatorię confundunt, & medicos in praxi ambiguos reddunt. Profluit ex hac falsa interpretatione, quod in hemicrania vena secanda sit in parte capitis opposita. Profluit quod in pleuritide V. S. in brachio dolori opposito sit revulsoria, & in brachio dolentis lateris derivatoria, cum tamen, in quocunque brachio secetur, sit derivatoria. Si cui veterum opinionem in compendio

dio legere placet, eam in Sebizii Commentario in librum Galeni, de revulsione sequentibus verbis inveniet: „Si fluxio investet partes infernas, sursum revellitur; si supernas, deorsum; si dextras, sinistrorsum; si sinistras, dextrorsum; si anteriores, retrorsum; si posteriores, antvorsum; si internas, extrorsum; si externas, introrsum.„

§. X.

Optima igitur & verissima distinctio inter V. Snem derivatoriam & revulsoriam invenitur, si punctum circulationis, cor nempe cum arteriis ascendentibus & descendentibus, pro fundamento ponitur. Quæcunque enim vasa ascendentia secantur, sive fiat sectio in capite sive sub lingua, sive in collo, brachiis, aut manibus, ratione capitis & pectoris derivant sanguinem, non vero revellunt: & omnes venæ sectiones in superioribus partibus factæ, intuitu capitis & pectoris nuncupandæ sunt derivatoriæ; intuitu vero abdominis & partium inferiorum revulsoriæ. Et sic contra: si venæ sectiones in pedibus fiunt, ratione partium superiorum adpellantur revulsoriæ; ratione vero inferiorum derivatoriæ. Posita hac certa & verissima distinctione, clare elucet, quod auctores a Galeno ad nostra usque tempora caute legendi, neque semper imitandi sint: multoties enim errant inter derivationem & revulsionem. Cum vero toto die differt effectus revulsionis ab effectu derivationis: cautius hinc inquirendum est quando revulsio & quando derivatio locum in hoc vel illo affectu, subjecto, & ætate habet.

Melior substituitur distinctio V.S. revulsoriæ & derivatoriæ.

§. XI.

Revellentium secunda differentia qua sunt vel evacuantia vel non-evacuante.

Altera differentia inter revellentia est, quod considerentur ut *evacuante & non evacuante*. Revellentia *evacuante*, partim sanguinem sincerum partim vero serum, vel sanguinem in serum solutum evacuant. Sincerus evacuatur sanguis revellendo, vel per venæ-sectiones vel per scarificationes, vel per hirudines: in serum vero solutum per vesicatoria, fonticulos, balnea, fots, vel per interna laxantia, purgantia, diuretica.

Non-evacuante revellentia sunt omnia externa, quæ per dolorem vel irritationem motum tonicum invertunt.

§. XII.

Tertio differunt quatenus sunt interna vel externa.

Porro dividuntur revellentia in *interna & externa*. Interna sunt purgantia, laxantia, clysteres, diuretica. Externa, venæ sectio, scarificatio, hirudines, vesicatoria, fonticuli, (quæ simul revellentia evacuante audiunt) rubefacientia, sinapismi, frictions, ligaturæ, balnea, pediluvia, fots, cucurbitulæ cœcæ, compressio digitorum, & quæ partim dolore, partim calore congestiones revocant, retrahunt, & divertunt.

§. XIII.

Quid sit motus tonicus?

Brevissimis cum definitionem dedi, quod revellentia sint media motum tonicum invertentia & mutantia: necessarium hic esse ducō, ut demonstramus & explicemus, a) quid sit motus tonicus, b) quis ejus usus, effectus, & commodum. Quid sit motus

motus tonicus, inventor ejus, beatus nunc, Stahlius optime declarat in Dissertatione ejus *de motu tonico vitali*, aliisque cum hac connexis scriptis & disputationibus: præprimis in Theoria ejus vera plurimis in paginis: quod nempe sit strictura & tensio partium fibrosarum non continua sed reciproca, & ex directione naturæ modostringens, modo remittens. Motus tonicus est motus contractorius & relaxatorius cordis & arteriarum sanguinem a partibus interioribus ad exteriores in habitum carnosum & peripheriam mittens, & harum partium motus interiori contrarius, sanguinem e peripheria ad centrum reprimens est utique & proprie sic dictus motus tonicus Stahlii. Uterque vero horum motuum a natura sive anima immateriali dirigitur pro re nata, in una parte magis stringitur, in altera vero relaxatur: prout res exigit, ad nutum naturæ modo intenditur & augetur, modo stringitur: imo aliquando plane suspenditur.

§. XIV.

Hujus motus origo, & causa formalis & efficiens est lapis ille offensionis & nodus Gordius, in quo ad hunc usque diem medicorum sententiæ discrepant, & si nunquam, certe in hoc hallucinantur Mechanici, qui mechanismum solum, excluso motore, pro causa efficiente motus tonici agnoscunt: cum tamen mutationem & variationem hujus motus ex animi pathematibus negare nequeant. Certo certius est, animam sive naturam affectibus sic dictis, ira scilicet, terrore, gaudio, mœrore &c. mutatam, motum tonicum in

Hujus motus tonici causa efficiens est anima.

corpore mutare, confortare, stringere, mitigare, sistere: hinc certum quoque est, animam motus tonici effectricem & directricem esse. Atque hoc magis elucebit, quando *usus & effectus* motus tonici consideratur: ubi *usus & effectus* primarius est, ut actiones vitales, ad normam naturæ conserventur & exerceantur, inter quas præcipua est circulatio sanguinis & humorum, quæ quamdiu protrahitur, causa est vitæ, & quamdiu regulariter exercetur, tam diu sanitatis auctor est.

§. XV.

Motus tonici est causa efficiens actionum vitalium, sanitatis, & vitæ.

Non sola vero circulatio sanguinis causa vitæ & sanitatis est, sed omnes & singulæ actiones vitales, si secundum ordinem & regulas naturæ a Deo concessas & connatas, mediante motu tonico, fiunt, & efficiuntur, inter quas primariæ sunt, coctio, aut potius digestio ventriculi, chylicatio, sanguificatio, secretiones & excretiones. Et intuitu harum actionum, motus tonicus audit motus tonicus vitalis; quia actiones vitales, unice & primario absolvit, efficit, & perficit.

§. XVI.

Motum hunc tonicum æqualem semper natura conservat nisi aliquod officiat impedimentum.

Quamdiu naturæ nullum impedimentum opponitur, tamdiu æqualem servat hunc motum, & actiones vitales sine sensu vel incommodo operatur, & hominis sanitatem incolumem servat. Si hominis natura a peccato originali libera mansisset, tanta ejus fuisset ratio, & vires, ut nullum impedimentum has actiones turbans admisisset: amissa vero per lapsum ima-

imagine Dei, perdita simul est ratio, & vires vitales corruptæ sunt.

§. XVII.

Mors ^{Συμφορ} peccati a Deo constitutum, & hanc inseparabiliter concomitant causæ morborum: quæ cuncta per usum & magis per abusum sex rerum non naturalium porta ubique patula introducuntur. Male dicta propter peccatum terra Genes. Cap. III. v. 17. exhalat & emittit causas morborum in aerem, protrudit in fructus & olera, dispargit in potulenta, hinc utique mors in olla paratus est homini, labor, & onus; ex perdita & perversa voluntate oriuntur animi pathemata dimidiam partem causarum morborum implentia.

Impedimentum ejusmodi est peccatum, quod causæ morborum & mors ipsa sequuntur.

§. XVIII.

Per se & intuitu mixtionis, compositionis & consistentiæ homo præprimis quoad partes fluidas male cohæret, & omni tempore pronus est ad dissolutionem & putrefactionem. Præservatio vero hujus corruptionis sola quærenda est in motus tonici perennitate, qua mixtura sanguinis & humorum fluxilis servatur & partes ad putredinem pronæ in variis cribris fecernuntur & excernuntur: qui usus & effectus motus tonici præcipuus & præstantissimus est. Multo magis commodum præstat hic motus, si ex prædictis causis morborum una vel plures in corpus irreperunt & dissolutionem mixtionis minitantur: tunc natura motum hunc tonicum augere, magis intendere & stringere necessitate cogitur. Quapropter circulum san-

Hujusmodi impedimentum quod ad partes fluidas. Et quod huic sit naturæ remedium.

guinis celeriores reddit, ebullitiones excitat, frigus calorem, spasmos, convulsiones & dolores producit, vires supprimit, & totum corpus morbosum reddit, donec impetrata secretionem & excretionem peregrinum ejiciat, & sic sanitatem restituat. Sub hoc labore, præsertim si materia morbofa indolis sit acrioris, corrosivæ, volatilioris, & plethora sanguinis progressum impediat; fieri aliter non potest, quin in hac vel illa parte inflammationes, stagnationes, infarctus oriantur, quibus præsentibus aut imminentibus natura, mediante motu tonico, congestiones sanguinis & humorum in partem affectam dirigit: quæ congestiones partim dolores excitant, partim inflammatorias stagnationes augent, & periculum minitantur.

§. XIX.

*Quomodo
in plethora
natura sibi
ipsa prospiciat?*

Sola sæpe plethora corpori molesta, præsertim in subjectis hæmorrhagiis affuetis, est objectum, quod naturæ occasionem præbet, congestiones ad locum hæmorrhagicum dirigendi laudabili cum hoc fine, ut plethoram, sufficiente hæmorrhagia, imminuat. Sine congestionem, versus caput nunquam spontanea, exoritur hæmorrhagia narium. Ad hanc laudabilem & salutarem exonerationem & evacuationem sanguinis natura motu tonico partium inferiorum ceu instrumento utitur, quo sanguinem ex partibus inferioribus ad superiores restringit, vasa sanguifera distendit, donec in extremitate alicujus vasculi ruptura fiat, & continuante congestionem sanguinis copiam sufficientem evacuaverit. Quæ exterminata, tonus partium inferiorum

riorum remittit, sanguinis fluxus revocatur, & sic congestio compescitur. Idem producitur effectus naturæ beneficio in aliis hæmorrhagiarum speciebus, finis propositi feliciori modo attingendi gratia, nec opus est, ut medicus ei ullo adminiculo subveniat.

§. XX.

Quando vero natura ipsa aut ex vitii hæreditarii *Quodnam* ad errores proclivitate, aut propter innumerabilia im- *fit facien-* pedimenta finem attingere & cursum absolvere non *dum, si na-* valeat, congestiones facere nimis attentet, in loca pe- *tura ex vi-* riculosiora dirigat, dolores sensibiliores excitet, inflam- *tio hæredi-* mationes augeat, evacuationes sanguinis vel seri ni- *tario aut* mis diu & copiose protrahat: tunc medici, naturæ *alia ob impe-* ministri, officium est, ut impedimentis remotis, na- *dimenta a* turam errantem revocet, & via tutiori & planiori in- *sine aber-* cedendi ei occasionem præbeat. *ret?*

§. XXI.

Ad hunc scopum impetrandum optimo consilio *Ad hæc pro-* a veteribus inventa est, *methodus* sic dicta *revulsoria*, & *pellenda* ma- non sine fructu & effectu excogitata sunt remedia re- *la est exco-* vellentia, quæ, pro rerum statu & variatione, modo *gitata me-* ceu interna propinquantur, modo ceu externa exhiben- *thodus re-* tur. Remedia, media, auxilia & adminicula, nomi- *vulsoria &* ne revellentium insignita & in praxi medica a multo *revellentia,* jam tempore cognita & experimentis probata, sunt *que sunt* scilicet 1) *interna* *vel interna* *vel externa.*

purgantia,
laxantia,

Quenam
sint interna?

diure-

diuretica,
diaphoretica,
clysteres.

Num vomitoria huc quoque sint referenda?

Veteres in hanc classẽ & vomitoria retulerunt, quando ipsis animus fuit, congestionẽ humorum ab inferioribus partibus ad superiores retrahendi. Sic apud Sebizium legitur: *Decumbente humore ad inferna, revellimus per vomitum*; & pro hac positione demonstranda allegatur Hippocrates, qui Sect. V. Aphor. 32. enunciat: *menstruorum eruptionem tollere vomitum cruentum*. An vero in hac commentatione satis caute agant, vix credere fas est. Hoc quoque respectu ab hodiernis sæpe laudatur usus ipecacoanhæ vomitorius in dysenteria. Id autem statuunt suffulti Hippocr. verbis, qui Sect. VI. Aph. 15. *diuturnum*, inquit, *alvi profluvium vomitu a natura facto curari*. Experientia vero docet, hoc raro cum emolumento, plurimum vero cum nocu-mento subsequente fieri. Et uti raro revulsio a partibus inferioribus ad superiores proficua est, ita rarissime tutus instituitur vomitus revulsorius. Mensium quidem fluxus facili negotio sisti & versus ventriculum revelli potest, naturæ vero motus menstrui periodici perversi non removentur, quin, si exitum impofterum sanguis non inveniat per uterum ejusque vaginam ut loca pro hac hæmorrhagia tutiora, certo regurgitabit, & in ventriculo evacuationem, periculo non vacantem, eliger.

Quenam sint externa?

2) *Externa*, quæ in tres classes commode dividuntur, & sunt

a) San-

α) Sanguinem evacuantia, sicuti venæsectio, scarificatio, hirudinum adplicatio.

β) Serum evacuantia, uti fonticuli, vesicatoria.

γ) Non evacuantia, sed solum allicientia uti rubefacientia, frictiones, ligaturæ, cucurbitulæ cœcæ, balnea, pediluvia, fots, compressio digitorum, pilorum evulsio.

Omniū horum remediorum operandi ratio nude & unice consistit in motus tonici perversione & congestionum periculosiorum, & morbosarum revocatione; id quod ea efficiunt partim evacuatione, partim irritatione, vel doloris aut caloris in loco a parte affecta remoto excitatione.

§. XXII.

Ad hanc normam examinabimus *revellentia* evacuantia & quidem

1) *interna*, inter quæ primum locum occupant *purgantia* vel *laxantia*. Hæc non sine irritatione & nauseabunda sensatione materiam mucosoferosam in ventriculum & intestina alliciunt, & partes has sensibiles raro sine dolore afficiunt. Ubi vero irritatio & seusus injucundus; ibi affluxus humorum. Quum omnis præterea affluxus major quam ordinarius congestionem humorum supponat; nulla autem congestio sine motus tonici in locum evacuationis directione oriatur; hinc quamdiu operatio purgationis durat, tum diu congestiones ex aliis locis revocantur, & motus tonicus a partibus superioribus vel exterioribus invertitur ad interiores vel inferiores. Purgantia adeoque, dum invertunt motum tonicum, revocant affluxum

Agitur de
revellentibus evacu-
antibus &
quidem
1) inter-
nis quo re-
feruntur
a) pur-
gantia
&
b) laxan-
tia.

affluxum sanguinis & humorum nimium a capite & partibus superioribus; & dum evacuant simul mucum & serum in loco ad hanc excretionem naturaliter destinato, affluxum hujus excrementi a loco minus tuto retrahunt, & in loco apto exterminant. De pilulis cephalicis vulgo creditur, quod caput purgent: raro vero consideratur, per quod cribrum excrementa ejiciant; quod alio modo fieri non potest, nisi revocatione muci & humorum seroforum ad ventriculum & intestina. Sic observavi, quod purgantia fortiora & sensibiliter stimulantia tussim humidam & copiosam, Phthisin minitantem, interceperint per sufficientem & continuatam revulsionem.

§. XXIII.

c) itemque
clysteres.

Optime quoque & securiori modo quam purgantia revellunt clysteres stimulantés & purgantibus acuatí, præprimis in subjectis hæmorrhoidibus obnoxiiis. Sæpissime enim accidit, ut hæmorrhoides regurgitantes caput vel pectus repleant, a quarum regurgitatione in capite apoplexia, hemiplegia, cephalalgia, in pectore asthmata, inflammationes, tusses ferinæ vel phthificæ ne suboriantur timendum est. Quid in hujusmodi casibus utilius & convenientius inveniri potest, quam revulsio congestionum in eum locum, ad quem ex naturæ præscripto pertinent? Eandem utilitatem adferunt quoque in foeminis, quæ ex mensium fluxu impedito & regurgitante male se habent: in his tamen affectibus non nudi emollientes, sed simul stimulantés clysteres injiciendi sunt ex decocto prunorum

rum cum foliis fennæ, fapone Veneto, & fale aliquo stimulante parati. Junckerus etiam in hemicrania revellentia in locis remotis laudat, e.g. evacuationes sanguinis, in partibus inferioribus, laxantiâ, pediluvia frictiones lateris oppositi, applicationem cucurbitularum cæcarum & in malo refractario vesicatoria furis applicata.

§. XXIV.

Dantur & casus, in quibus diuretica pro scopo revellendi opem præstant. Tum enim cum stimulo aliquo urinam evacuant, alliciunt materiam seroso catarrhalem, a capite & pectore ad renes, ubi tutiori modo quam in capite & pectore excernitur. Ast foliis diureticis haud fidendum. Eorum enim operatio non tota ad renes tendit, sed eadem facilitate in locum affectum dirigitur. Hinc sine adminiculis externis, præprimis clysteribus, frictionibus, & cucurbitulis, in dorso applicatis optato cum effectu raro adhibentur.

d) nec in non diuretica.

§. XXV.

Referuntur & *diaphoretica* inter revellentia, quando scilicet materia morbosa visceribus pectoris & abdominis inhærens, in peripheria corporis tutior fecernitur vel excernitur; & hæ revulsionis species a veteribus dicitur: *revulsio ab intus ad extra*. Sed eandem cautam curam postulant diaphoretica quam diuretica. Eorum enim operatio consistit in augmentatione motus humorum & resolutione sanguinis in serum, quod

e) denique diaphoretica.

vero non semper & certo in cute, nisi natura coope-
rante, sed plerumque & interne in loco affecto fecer-
nitur & excernitur. Quodsi autem operatio diapho-
reticorum adminiculis externis, fotibus, frictionibus,
pediluviiis, balneis, imo pro re nata vesicatoriis, suf-
fulcitur; scopus faciliori modo optinetur. Exulent
vero semper diaphoretica calida, volatilia & spirituo-
sa, & tutius adhibentur fixa & aquosa, ex aquis dia-
pnoicis & decoctis theiformibus consistentia.

§. XXVI.

2) externis,
nimirum
a) sangui-
nem evacu-
antibus; in
quibus est
a) venæse-
ctio.

Inter revellentia externa & quidem sanguinem eva-
cuantia, & simul congestiones revocantia, primum
est *venæsectio*. In hac præscribenda veteres nimis fa-
ciles fuerunt, non ubique tamen cauti; sæpius enim
in hæmorrhoidum & mensium fluxu nimio venæse-
ctionem in brachio administrarunt, parum solliciti, an
proficuum sit eo modo fluxum suppressere. Expe-
rientia enim in dies docet, quod facile sit fluxus ejus-
modi cohiberi, difficile vero eos restitui, & quod sup-
pressos presso pede sequantur plura mala consecutaria.
Venæsectionem quoque in brachio commendant in
affectibus lienis, pectoris, hepatis, ventriculi, renum
&c. quæ vero raro nisi in plethora, & subjectis junio-
ribus, & magis pro scopo depletorio, quam revulso-
rio, effectum laudabilem edit. In plurimis subjectis
in ætate mediâ ac vegetiori degentibus affectus infimi
ventris pro prodromis & moliminibus hæmorrhoi-
dum habendi sunt, in quibus venæsectio revulsoria
in cubito vel manu majorum turbarum auctor esse
potest.

potest. E contrario autem derivatoria in pede convenientior est, & viam sternit ad expeditiorem sanguinis hæmorrhoidalis evacuationem. Uno verbo: raro venæ in partibus superioribus secure secantur, præsertim post annum trigesium, meliori vero cum effectu in pedibus administrantur etiam ante annum trigesium: in specie sibi caveant juvenulæ & mulieres, ne hujus generis venæsectiones in brachiis inconsiderate, & sine respectu ad mensium fluxum fieri permittant.

§. XXVII.

Ejusdem conditionis est alterum medium revulsorio-evacuatorium, quod *scarificatio* adpellatur. Negari quidem non potest, quod in corporibus spongiosis sæpius commode adhiberi possit & majoris & præfentioris sit utilitatis quam venæsectio. Intuitu enim faciei effectus revulsorius dubius non est, si scarificatio fiat in scapulis, tergo & femoribus. Qui usus de venæsectione prædicari non potest; ex anterioribus enim congestio sic retrorsum trahitur, & multis medetur malis faciei partes occupantibus. Prodest quoque revulsio per scarificationem partium inferiorum coxarum & crurum in multis aliis affectibus capitis congestoriis: at iterum cautius mercandum est cum hac evacuationis & revulsionis specie, ne ex inferioribus partibus retrahamus congestiones ad superiores & ex interioribus perverso consilio ad externas. Natura enim, dum molitur hæmorrhoides vel menses producere, facili negotio in hoc conamine laudabili ad

b) *scarificatio.*

errores seducitur, & desistit ab interno proficuo fine & evacuatione. Sic in dolore capitis cum mensium fluxu complicato mulier viginti sex annorum persuadetur cucurbitam cum scarificatione in verticem adplicare; mox menses sistuntur, nunquam redeunt, & dolores capitis in ætatem usque sexagenariam pertinaciter sæviunt. Si unquam scarificatio revulsoria locum habet, cum emolumento admittitur in scapulis, tergo & femoribus in affectibus faciei catarrhosis, vel in gutta rosacea; in scabie autem retrogressa, ea in plurimis corporis partibus extremis & periphericis instituitur. Nocet vero in moliminibus hæmorrhoidalibus internis, quia illa congestiones a loco excretionis revocat, & naturam ab excretionem laudabili distrahit. Quodsi contra conducit congestionem a capite revocare, & quidem in corpore spongioso; scarificatio locum habet in coxis, femoribus & suris.

§. XXVIII.

(c) *adplicatio hirudinum.*

Quando hæc minus succedat?

Tertium revulsionis medium evacuatorium consistit in applicatione hirudinum. Hæ sunt animalcula aquatilia, sanguinem suctu elicientia, & operantur tam evacuando, quam suctu dolorem inducendo, sicque motum tonicum invertendo & congestionem a partibus remotis avertendo & revocando. Inter revellentia usitata & utilia non ultimum locum tuentur, verum vero eadem cum prudentia adhibendæ sunt, quia venæsectio & scarificatio. Raro scilicet pro scopo derivante in partibus superioribus admittas: quanquam juxta aliorum mentem revellentium vices sustinere

sustinere videantur; si videlicet pone aures ponantur ad rubedinem faciei revellendam. In hunc scopum adplicatæ opem quidem præstant, sed momentaneam & in constantem: exorta enim nova congestione, rubedo cum fœnore recrudesceat, & consuetudinem ad ulcerosæ materiæ excretionem inducunt. Id quod tentaverat atque periclitata erat juvenis nobilis quædam fœmina, quæ jam quinquagenaria, usque adhuc hæc experimenta dolet & luget; ulcera enim madentia in loco suctionis erupta, in hunc usque diem cum tædio habet. Firmo hinc stat talo Hippocratis supra (§. VIII.) allegata sententia de Venæsectione revulsoria. *Studendum est ut quam longissime &c.* quæ & ad hunc hirudinum usum adplicanda est.

§. XXIX.

Eminentiori cum utilitate in congestionibus partium superiorum ad furas & pedes hirudines ut revellentia admittuntur. Siquidem nota mihi est mulier asthmatica quæ majus semper levamen ex suctu hirudinum, quam a venæsectione in pede sensit. Dantur *ἀντιφοβοί*, venæsectionem abhorrentes, qui hujus loco hirudinum applicationem libenter ferunt. Specialiter vero & prudenter adhibentur ad venas hæmorrhoidales externas, quando mens est, fluxum hæmorrhoidalem aut suppressum revocandi, aut molientem excitandi, quo restituto vel promoto symptomata abdominis aut præcordiorum hypochondriaca mitigantur. De horum animalculorum usu legi meretur, dissertatio Stahlii de Sanguisugarum utilitate anno 1699. Halæ

læ edita & 1705. recusa, in qua utilitas tam generalis, quam specialis per casus demonstratur, & eorum usus medicis quam maxime commendatur: itemque alia dissertatio non infimæ sortis, quam edidit Crausius, Jenensis, anno 1695. de hirudinibus, quæ pari fructu & commodo, atque prior recensita, legentem recreabit. Potissimum vero ac specialiter in priori usus in negotio hæmorrhoidali ostenditur & commendatur.

§. XXX.

β) Serum
educantibus
quorsum
pertinent
(a) vesica-
toria.

Serum educantia revellentia, sive quæ materiam seroso-catarrhalem evacuando, simul a partibus minus congruis & nobilioribus ad ignobiles alliciunt, sunt vesicatoria & fonticuli, quorum operandi ratio vero major est in irritatione ardoris & doloris, quam in nuda evacuatione. Consistentem hic invenio dissertationem Albertianam de therapia per dolores, anno 1730. editam, in qua plurimum remedium fit mentio. §. 4. specialiter, & primo loco ponuntur vesicatoria. Quorum operandi ratio ita describitur, quod non consistat in nudæ vesicæ excitatione, vel feri morbofi in hanc vesicam evacuatione, neque in analogia, qua alias venenum externe adplicatum, venenum in corpore latens abducere, attrahere, & ad se allicere creditur, sed magis in dolorificæ sensationis inductione, & motus inversione & mutatione. Verba auctoris heic locum merentur: „Inde facile liquet, quod hi dolores, quos „vesicatoria excitant, præcipue connexos motus alterent & per hosce reliquas morbosas affectiones corrigere ac sub perita ordinatione, directione, & modificatione.

„dificatione salutarem effectum promovere adjuvent.
 „Quo minus itaque vesicatoria dolent, eo minus,
 „quoad reliquum usum operantur; quo magis dolo-
 „rem causantur, eo potentius ac citius alterationem
 „perficiunt: quare sæpe sola ad revulsionem suffi-
 „ciunt. „

§. XXXI.

Si commode adeoque cum optata utilitate vesicatoria ut revellentia adhibere intendimus, magis præstat ea in loca a partibus affectis remota adplicare: in furis hinc semper securior eorum est locus, quam in cervice, scapulis & humeris. Experientia quidem testatur, quod vesicatoria cubito adplicata, dolorem dentium prompte mitigarint. Quærendum autem est, an non eadem promptitudine vesicatoria furis adplicata dolorem dentium mitigare vel tollere possint? Experientia doctus id affirmo. Contra vero dehortor ab eorum usu in capite vel cervice; sæpius enim affluxum humorum ad mortem usque promovet, quod in affectibus soporosis & deliris non semel ex aliorum damno vidi, & expertus sum, præsertim cum vesicatorium magnum, magna cum fiducia toti abrafo capiti impositum fuit.

*Quomodo
 hac utiliter
 adplicari
 debeant.*

§. XXXII.

Setacea a plurimis medicis ad revellentia referuntur: dum autem semper in loco parti affectæ proximo applicantur, e. g. in affectibus oculorum in cervice: majori jure inter derivantia numeranda sunt.

*Num hac se-
 tacea possint
 referri?*

D

§. XXXIII.

§. XXXIII.

(b) Fonticu-
li.

Inter revellentia evacuantia locum, non infimum tenent fonticuli, qui a plurimis quidem medicis in affectibus oculorum, derivationis scopo in brachiis excitati, commendantur; majorem tamen effectum in his affectibus præbent, si revulsionis gratia in inferioribus partibus, in tibia vel sura excitantur.

§. XXXIV.

y) non-eva-
cuantibus.

Quomodo
veteres hoc
explicave-
runt?

Sequuntur nunc *revellentia non-evacuante* sed solum mediante dolore, ardore, calore, & relaxatione fibrarum operantia, tonum invertentia, & congestiones a partibus superioribus, vel nobilioribus ad inferiores & minus nobiles avertentia; & hæc sunt urticationes, sinapismi, rubefacientia, frictiones, cucurbitulæ cæca, ligaturæ, compressio digiti, acupuncturæ, item balnea, pediluvia, foci calidi. Veteres in multis remediis crediderunt vim attractivam, sicuti & naturæ adscripserunt vim expulsivam. Hinc Roboretus, qui anno 1592. tractatum de vesicatoriis edidit, de quatuor modis operandi hæcce profert: „Operantur revellentia aut per dolorem, aut per calorem vel vi vacui, vel substantiæ similitudine.” Per dolorem revellunt vesicatoria, sinapismi, urticationes, ligaturæ, compressio digitorum, cucurbitulæ; ubi enim dolor, ibi affluxus. Per calorem operantur balnea, pediluvia, foci. Vi vacui venæsectio & purgantia; substantiæ similitudine vesicatoria sive in iis contentæ cantharides. Uti enim bufo exsiccatus vulnere ex morfu viperæ impressus humores & cum his venenum ita attrahit, ut intumescat

tumescat ad magnitudinem viventis; ita cantharides in vesicatoriis virus in corpore latens extrahere a veteribus creditum est. Quem vero attractionis modum ad qualitates occultas nondum satis demonstratas, refero, & contra rationi magis consentaneum esse censeo, effectum hunc, nempe elevationem vesicæ, dependere instrumentaliter ex motu auctiori tonico eò a natura directo, ut una cum serosa materia virulentia a cantharidibus in poros cutis insinuata, rursus evacuetur, ne illa quoque incommodum corpori inferat.

§. XXXV.

Urticationes fiunt, dum membra vel artus urticis minoribus leviter cæduntur, vel fricantur, ut sensus ardoris, & rubor excitetur; membra plerumque paralytica, & sensus expertia cæduntur, ut influxus alii-
Admon-eu-
cuan-
tia re-
ferunt
(a) urtica-
tiones
 ciatur spirituum. Sicuti vero sensibilitas longe aliam, quam spirituum præsentiam pro causa agnoscit, ita & raro effectus speratus ex urticatione resultat. Quid? quod sine hujusmodi sensu membris paralyti tactis urticationes, & alia irritantia accommodantur: præstantiori cum effectû deprehenditur hoc medium, revellens in scabie retropulsa revocanda.

§. XXXVI.

Sinapismus est seminis sinapi vel folius vel cum aliis rubefacientibus cuti ardorem & rubedinem inducentibus applicatio. Promptius operatur sinapi cum aceto vel vino paratum, quale inter embamma-
(b) Sing-
pismos.

ta mensæ adponitur, non sine emolumento in forma cataplasmatibus plantis pedum vel furis impositum vidi, quando aut pustulæ aut alia exanthemata pedum retrogressæ fuerunt. Elicit quoque id capiti suprapositum achores retrogressos. Præsentaneo item cum effectu mammis supponitur, quando nempe catarrhi, in hoc loco familiares, retrogradi facti, cardialgiæ vel aliorum pathematum auctores fuerunt. Sic mihi nota est fœmina, quæ post exsiccatum catarrhum, quo sub mammis diu laboraverat, ex cardialgia fere maniaca facta, cui vero supraimpositus cum linteolis sinapis præsentaneam operam præstitit, revellendo scilicet catarrhum ab internis partibus nobilioribus in locum excretionis consuetum.

§. XXXVII.

(c) *Friktiones.*

Friktiones, quando excutia vel pannis asperis aut laneis aut linteis, cutis ad rubedinem & dolorem usque fricatur, non leviolem vim revellendi habent & partim ex interioribus ad peripheriam, partim a superioribus ad inferiores partes motum tonicum vertunt.

§. XXXVIII.

(d) *Cucurbitularum cæcarum usum.*

Cucurbitularum cæcarum sine scarificatione usus, per sensum ardentem, quem inducunt, revellit. Veteres eorum usum commendarunt in hæmorrhagiarum ad hypochondria, in fluxu mensium nimio ad mammas. Existimo autem, eas in priori casu majori cum fructu ad coxas & femora, in altero vero ad tergum

gum esse adplicandas. Mammæ enim ut organa delicatiora facile lædere & ad indurationes, vel nimiam intumescentiam disponere valent.

§. XXXIX.

Balnea, pediluvia, & fomenta calida mediante calore & relaxatione fibrarum congestiones alliciunt, & partes affectas, tam interiores quam superiores ab iis liberant. De balneis habeo, quod laudare possum, scilicet materiam, causam torminum infantum, in peripheriam ex intestinis ducunt, & inquietudinem brevi sopiunt. De *thermarum* usu revulsorio tam ab internis ad externas partes, quam a partibus superioribus ad inferiores, quando quæritur, quo tempore dei tutius adhibendæ sint? respondeo, quod optime ante meridiem ab hora nona vel decima usurpentur: tota scilicet peracta chylicatione & sanguificatione, præprimis si simul mane bibantur aquæ medicatæ. Alliciunt enim tali modo aquas in intestinis adhuc fluctuantes per vasa mesaraica in sanguinem, qui intus cum eis miscetur & diluitur. Deinde si frigida in copia ingurgitata acidulæ sensum frigoris in peripheria excitant, hic commode per calorem humidum temperatur & corrigitur. Vitandus vero est calor nimius, ne ebullitiones massæ sanguineæ inducantur. Post balnea quoque vitanda est refrigeratio externa usque ad prandium. Quæ vespertino tempore adhibentur balnea, hoc quidem commodum habent, ut corpus in continua transpiratione maneat: in eo vero nocere possunt, quod chylum non satis elaboratum,

tum, & crudum præmature in sanguinem alliciant, & sic tam cylificationem quam sanguificationem turbent. Evacuatis vero intestinis, ante meridiem nihil peregrinum in massam sanguineam ducere possunt.

DE USU REVELLENTIUM.

§. XL.

*Contra
quosnam
morbos re-
vellentium
valet usus?*

Operandi ratione satis demonstrata, nunc contem-
plabo morbos & affectus quosdam, in quibus
revellentia profunt & cum emolumento adhi-
bentur. Hi vero sunt *congestionibus, hæmorrhagiæ, spasmi,
convulsiones, deliria, catarrhi, affectus retrogradi.*

§. XLI.

*Quinam
morbi ex
congestionibus
versus
caput &
versus pe-
ctus orian-
tur?*

Ex congestionibus versus caput oriuntur hæmorrhagiæ narium, inflammationes, deliria, catarrhi, vertigines, affectus soporosi, apoplectici, epileptici; circa pectus hæmoptysis, pleuritis, tussis, asthmata, & pluri-
mi horum affectuum periculum minitantur. Qua-
propter locum habent revulsio & media revellentia.

§. XLII.

*Congestionibus
sanguinis & hu-
morum er-
roneis ge-
neratim
quomodo
medendum?*

In congestionibus sanguinis & humorum, quæ
est quasi scaturigo plurium aliorum affectuum natura
intendit finem excretionem aut sanguinis sinceri aut in-
serum catarrhosum soluti peragendi. Medicus hinc
merito considerat, an impulsus naturæ sufficiat ad fi-
nem

nem propositum sine impedimento attingendum. In hoc casu naturæ soli relinquendum est opus. Cum vero errantem & pertinacem medicus observat naturam, quæ congestiones in loca minus apta & periculosa dirigit: e. g. quando in annosioribus hæmorrhagiam narium plane incongruam molitur, & prævia vertigine facile apoplexiam excitare valet; deinde quando in pectore hæmoptysin, vel catarrhum suffocativum illa minatur: de tempore naturæ erranti obex ut ponatur, & per revellentia congrua congestiones revocentur, necesse est. Junckerus in conspectu medicinæ, in congestionibus generatim consideratis, methodum medendi sequentibus exorditur: „*Alvus, quæ in congestionibus ordinariæ stricta est, solvatur, & soluta servetur, 1) vel per blandum laxans e. g. rhabarbarinum, pill. Becheri c. extr. belleb. nigr. combinatis, magnesiæ albam &c.*”, hac ratione revulsio quoque humorum a superioribus partibus obtinetur. Non sola vero hæc sunt revellentia in congestionibus proficua, sed quoque profunt venæsectio, scarificatio, frictio, pediluvia, balnea, vesicatoria.

§. XLIII.

In hæmorrhagiis in genere commendat Junckerus ligaturas, cum circumspeditione. Quoad speciales si-
ve particulares hæmorrhagias vero notandum est, quod *generatim hæmorrhagia medicanda sint?*
si hæ ætati convenient, inque loco non periculoso oriantur, & modum in quantitate non excedant, potius in *ἀντομαλία* naturæ relinquendæ, quam cohibendæ sint. Si vero vitiosæ appareant & freno indigeant, revellentia

vellentia inter auxilia alia non ultimum locum occupant.

§. XLIV.

Quomodo
hæmorrhagia
narium
sedentur?

Præprimis in hæmorrhagia narium excedente, tam in juvenili & adulta ætate, quam in annosioribus subjectis revellentium commodus est usus, & quidem venæsectio in pede tam curative in paroxysmo, sed cautius adhibenda, quam præservative ad præoccupandum reditum. Hofmannus in Med. ration. system. Tom. IV. P. II. p. 18. „In graviore, inquit, malo impetus sanguinis divertatur, hunc in finem proficua est palmaris venæsectio in parte inferiori, dein pediluvia temperata.„ Junckerus in hoc affectu, pediluvia, quæ revellendi scopo bene se commendant, proponit: & hæc sæpius sola sufficiunt. Si vero scopum non tangunt, tunc locum habet venæsectio, quæ respectu profusi sanguinis aut larga aut exigua portione fieri, imo urgente necessitate repeti potest. In ætate puerili sola sufficiunt pediluvia & conservatio corporis in æquali calore. Sic quondam puerum orphanotrophum, qui, adhibita aqua frigida, totus frigore tactus morti proximus erat, restitui per calefactionem in lecto, qua procurata, in momento sanguinis stillicidium cessabat. In Alberti Therap. methodo medendi prima indicatio est tempestiva diversio & revulsio, quæ consistit in venæsectione, frictionibus inferiorum, cucurbitulis cœcis ad inferius dorsum, & rubefacientibus ad plantas pedum.

§. XLV.

§. XLV.

De *hæmoptysi* cel. Junckeri in conspectu med. quartum momentum sive indicatio in methodo medendi est, *revulsio* & æqualis distributio sanguinis per totum corpus, ubi sub littera b) *revellentia* etiam externa, hic locum & usum habent, v. g. ligaturæ, frictiones, sinapismi in remotis partibus, foci calidi manibus, & imprimis plantis pedum applicandi; laxationes moderatæ & repetitæ nonnunquam instituantur, præcipue, quam primum congestiones versus pectus observantur. Circumspecta venæsectio hirudinumque applicatio num. 5. laudatur. b. Hoffmannus l. c. „*Quæ sanguinem a pulmonibus divertunt, sunt venæsectio, pediluvia, laxantia tamarindinata, passulata, rhabarbarina, & clysteres emollientes.*” Ligaturas extremorum caute usurpandas etiam commendat, ut sedata hæmorrhagia, non omnes simul sed successive una post alteram solvantur.

Quomodo hæmoptysis sananda?

Optima & quidem nunquam intermittenda in hæmoptysi sunt *revellentia*. Quia vero locus hujus hæmorrhagiæ periculosissimus est, & a prima sæpe eruptione pulmonibus labes immedicabilis infligitur; mirum non est, si non semper voto respondeant media appositissima. De venæsectione præprimis notandum, quod largior esse debet, non ad uncias, sed unam vel alteram libram administranda sit, præsertim præservative instituta, & curative non prius experiunda, quam quantitate sufficiente sanguinis jamjam ejecta.

Vesicatoria in hæmoptysi raro commendantur,
E quia

quia præconcepta opinione laborant practici, ac si virulentum quid cantharidum, cum sanguine communicetur. Verum enim vero quando catarrhus quidam ulcerosus retrogressus cum hæmoptysi complicatus est, convenienter & sine noxa, pro revocando catarrho, ad furas applicari, cauto tamen & moderato usu, possunt; nam abusus nocet.

§. XLVI.

Num ad vomitum cruentum revellentia conducant?

Raro quoque revellentia in vomitu cruento laudantur: cum vero, ut sæpius fieri solet, ex obstrukctione mensium vel hæmorrhoidum, vomitus ortum ducat, unica nonnunquam venæsectio revulsoria in pedibus & quidem repetita sufficit ad menses revocandos & periodum eorum restituendam; ita quoque *birudines* ad loca hæmorrhoidalia appositæ fluxum revocant, & morbum solvunt. Quorum usus, per alia quoque revellentia suffulcitur, scilicet per venæsectiones in pedibus, pediluvia, fots, clysteres & extra paroxysmum per specialia & lenia laxantia præprimis rhabarbarina.

§. XLVII.

Quinam usus revellentium in hæmorrhagia vulnerum?

In hæmorrhagia vulnerum sæpius etiam locum habent revellentia, & quidem primario venæsectio in loco opposito & a vulnere remoto: præprimis, quando in festina deligatione sanguini effluxus nimis cito denegatus fuerit. In ebriis & plethoricis vulneratis hæmorrhagia larga proficua est: præmatura enim suppressa plerumque recrudescit & pericula minatur,

&

& de novo repressa inflammationum, dolorum & febris auctor est. Quid? quod difficilioris curationis sunt vulnera plethoricorum. Leonhardus Fuchsius Libr. VI. de morbis medendis cap. XI. quinque modos ad sanguinem sistendum proponit. Primus est qui fluxionem avertit tum revellendo, tum derivando. Quæ profluvium avertunt, id partim efficiunt citra ullam extra corpus evacuationem, alia vero cum evacuatione. Citra evacuationem avertunt, & alio trahunt cucurbitulæ sine scarificatione cum multa flamma admotæ, item frictiones & ligaturæ sive vincula, primum in propinquioribus partibus, deinde in remotioribus adhibita. Cum evacuatione autem avertitur, atque ad alias partes convertitur sanguis, tum ad proxima derivatus, tum ad contraria revulsus, vena in ea parte incisa, quæ e directo profusioni respondet, & quæ ipsis partibus sanguinem fundentibus juncta est, & quidem parce sed repetita vice. Hanc sanguinis evacuationem ille commendat ex autoritate Galeni.

§. XLVIII.

In affectibus capitis dolorificis, cephalalgia, clavo hysterico, hemicrania, cephalæa, odontalgia & otalgia hincinde tam a veteribus, quam neotericis commendantur varii generis revellentia. Plurimi enim affectus capitis originem ducunt a congestionibus sanguinis & humorum. Quæ media vero congestiones revocant, & revellunt, hæc primum locum curationis tenent & tuentur. Sennertus Lib. I. Part. I. cap. VI. catalogum a capite revellentium in chartam projecit:

quæ sunt venæsectio, cucurbitulæ sive scarificatio, hiru-
dines, clysteres, purgantia, frictiones, ligaturæ, ve-
sicatoria, fenticuli. In qua classe nihil desideratur
quam balnea & pediluvia.

§. XLIX.

*Et speciali-
ter in cepha-
lalgia.*

In cephalalgia methodus medendi ill. Junckeri, in
Consp. med. primum hoc indicans habet. *Motus hu-
morum specialis a partibus superioribus ad inferiores revo-
candus est: hinc ante omnia alvus, quæ ordinarie est ad-
stricta, solvatur vel per clysteres emollientes, carminativos;
vel in casu minus urgente, per lenia laxantia; & extra
paroxysmum per venæsectionem, cui ad meliorem derivatio-
nem pediluvia præmittantur. In cautelis dicit: pediluvia
in omnibus congestionibus, quæ versus caput & pectus con-
tingunt, multum levaminis exhibent: sanguinis enim ver-
sus illa loca restrictionem relaxant & ad pedes ducunt. De
venæsectione, cautela 33. habet: unicum & certissimum
artificiale remedium est venæsectio in pede, magna autem in-
cisione, & sufficiente quantitate administranda est, ut eo
major alteratio obtineatur. In gravidis, cephalalgia cor-
reptis, in brachio quidem olim instituebatur, hodie autem in
ipsis pedibus sine formidine venam secamus. Eandem fere
methodum in cephalalgia sanguinea proponit Alberti
in Therapia, item in cephalalgia prodromo apoplexiæ;
ubi prima indicatio est, ut tempestiva revulsio administre-
tur; hanc vero efficit per laxantia aloëtica & hellebo-
rata, per pediluvia, frictiones, venæsectiones in pede.*

§. L.

Quinam

De vesicatoriorum usu revulsorio in doloribus ca-
pitis

pitis facile dubitare potest neo-practicus, cum in per paucis scriptis hæc commendata inveniat, contra vero in medicina b. Hoffmanni systemat. legat, quod capiti vel partibus huic proximis adplicentur. Ast si perpendit, quod cetera revellentia in locis remotioribus commendentur, haud difficulter concludere potest, rationi consentaneum esse, ut hoc remedium ad partes diffitas pertineat. Derivationis quidem gratia vesicatoria cervici applicata aliquando opem præstant præsentaneam, sed non constantem, & postea naturam seducunt ad pertinaciores congestiones. Ex eo, quod in commerc. litt. Norimb. 1734. pag. 27. legitur: „*Contra ex remediis externis bulborum allii applicatio ad plantas pedum facta, cephalalgias vel contumacissimas absque noxa depellit, id quod per repetitas observationes firmatum habeo.*” colligi potest, quod, quid præstet minus, id magis præstare possit & majus. Sanio rem præ b. Hoffmanno sententiam fovere videtur cel. Junckerus, in Consp. med. Tab. de hemicrania. In hemicrania ubi in locis remotis revellentia laudat e. g. evacuationes sanguinis in partibus inferioribus laxantia, pediluvia, frictiones lateris oppositi, adplicationem cucurbitularum cæcarum, & in malo refractario vesicatoria suris applicata.

usus vesicatoriorum in doloribus capitis?

§. LI.

In odontalgia ad mentem ill. JUNCKERI l. c. p. 216. *Quinam revulsionem adfluxus promouent interne purgantia, externe venæsectiones, scarificationes repetitæ, vesicatoria prope flexuram cubiti in latere affecto.* Ego autem hæc, malim

usus revellentium in odontalgia.

ad furas applicare; quanquam in flexura cubiti adhuc tutiora sint iis, quæ cervici imponuntur.

§. LII.

itemque in
vertigine.

Ad affectus capitis refertur quoque *vertigo*. In hac ill. JVNCKERVS l. c. p. 236. commendat primo loco *laxantia blanda ad revellendos humores versus caput congestos*.

GOHL in praxi clinica & forensi p. 53. medicamentum adhuc unicum producit, quod magis revulsorie agere possit, & consistat in *pulvere squillæ præparatæ*. part. I. Rad. Cyper. rot. pulver. p. II. hujus pulveris gr. v. cum sale aliquo incidente miscenda & alternis diebus propinanda sunt. Ejus verba germanico stylo expressa sunt: „Es macht einen gewissen sensum revulsorium, der von Haupt merckliche diversiones schafft, welches ich schon bey andern Patienten mehr, die chronica vertigine laboriret, observiret habe.“ In dissertatione Lipsiensi de vertigine ao. 1640. edita §. 50. commendatur *revulsio in vertigine* & quidem *frictio* & *ligaturæ dolorificæ in partibus a capite remotis*, it. *pediluvia*, & *venæsectio in pedibus*. Auctor ligaturas in vertigine idiopathica in brachiis, in sympathica in pedibus fieri jubet, & rationem addit: „Scilicet quæ cautela observari studiose debet, ne alias pro revulsione fiat attractio ad caput, quod si enim vertigo est per consensum & ligentur brachia, fiet a partibus inferioribus ascensus materiæ ad caput.“ Hoc etiam opinatur de frictionibus. Cum vero vertigo idiopathica pari modo ac sympathica, per congestiones ad caput oriatur:

oriatur: sequitur quod media revulsoria solum ad partes inferiores adplicanda sint. Alia Rolfiniana dissertatio de vertigine de anno 1644. habet. „*In sympathica vertigine, venae inferiores secandae, quae non solum revellunt sed & evacuant.*„ Idem alia sub Schellhammeri praesidio ventilata §. 29. primam indicationem methodi medendi in *revulsione* locat.

§. LIII.

Apoplexiæ & hemiplegiæ prodromus plerumque in annosioribus est vertigo, hinc non nisi gradu differunt vertigo & apoplexia, & ab eadem causa, a congestionibus, originem ducunt, adeoque eandem postulant methodum, tam praeservandi, quam curandi. Prolixitatem hinc evitare studeo. Unicum ratione vesicatoriorum addo, quod in apoplexia quamquam lethali tantæ virtutis sint resuscitantia, ut ægroti, illis adplicatis, aliquando motum & loquelam recuperent. Sic uti mihi casus ex praxi parentis mei pie colendi in mentem venit, de duobus viris nobilibus, quorum, post quatuor simul adplicata vesicatoria, ratio, & loquela, & præterea alteri potentia eundi restituebatur, non obstante, quod prior quarto, posterior septimo die, moriretur. In apoplexia vero incompleta, quæ in nimia congestionem, nondum vero peracta extravasatione, consistit, tam vesicatoria, quam alia revellentia optatum præbent effectum,

Porro in apoplexia & hemiplegia.

§. LIV.

Epilepsiam symptomaticam in infantibus, præpri- Tum in epi-
mis *lepsiæ.*

mis cum ex catarrho retrogresso originem duxit, multoties per applicationem vesicatoriorum in furis factam vidi. Nec in tenellis corporibus eorum ardor vel dolor reformidari debet. Si ad mentem vel normam mechanicorum judicasset, in morbis convulsivis nunquam ausus fuisset vesicatoria adhibere: hi enim cum causam convulsionum in irritatione quærunt, omnia vellicantia & dolores inducentia rejiciunt. At non solum epilepsia, verum etiam morbus ille convulsivo-spasmodicus, germanice *Kriebel-Krankheit* dictus, repetito usu vesicatoriorum aliorumque revellentium sæpissime superatur & eradicatur.

S. LV.

*deinde in
affectibus
soporosis.*

In *affectibus soporosis* juxta cel. JVNCKERVM in *Consp. med.* p. 916. ad sensus excitandos & decubitum humorum a capite partim revellendum conducunt. a) *Clysteres stimulantés vel suppositoria acria*, b) *Ligaturæ partium oppositarum*, c) *frictiones*, d) *vesicatoria*, e) *cataplasmata rubefaciencia plantis pedum supposita*, f) *salia volatilia naribus adplicata*, g) *pilorum evulsio*, h) *acupuncturæ*. Et caut. 3. p. 918. *Fonticuli*, inquit ille, *senioribus mukum serosum a cerebro revellunt & sic stases soporosas præoccupant.* WEDELIVS in *affectibus soporosis*, quando clysterem acriorum & suppositoriorum usum commendat, rationem adjicit, *quia ani sensus longè delicatior est quam reliquorum intestinorum.*

B. Schelhammer in dissertatione de lethargo p. 29. commendat. a) *Venæsectionem*, b) *Cucurbitulas*, cum hac ratione: *hæ enim simul materiam revellunt, evcuant*

¶

§ facultatem animalem sopitam excitant. §. 53. maximam quoque promittunt utilitatem vesicatoria, quæ imminentem avertunt & præsentem multum imminuunt. Unde Willisius duos, hoc potissimum remedio, sanatos se vidisse testatur; humores enim serosos a centro ad circumferentiam attractos evacuant, & simul vi dolorifica exsuscitant ægrum.

§. LVI.

In lypothymia cel. Junckerus l.c. p. 923. habet: *in lypothymia. methodus medendi per exsuscitantia & refocillantia, in plurimis convenit cum methodo revulsoria.* Affectus hic aliquando ex spasmō sive motu tonico, in toto corpore ad spasmum usque aucto, oritur, mediante quo congestiones versus caput uberiore fiunt. In hoc casu revellentia spasmos infringunt, & congestiones revocant. Præstat quoque præsentaneum effectum calefactio pedum per lateres vel lagenulas, aqua calida impletas, item si vires permittunt, per pediluvia.

§. LVII.

In affectibus pectoris non minori utilitate adhibentur revellentia, præprimis, quando catarrhi retrogressi *in affectibus pectoris.* fovēt affectum. Sic asthma vel catarrhus suffocativus solo pediluvio sæpius in momento mitigatur: & in infantibus, vesicatoriis furis applicatis, non semel sublatum hunc affectum periculosum vidi. Primum indicans ill. Junckeri, l.c. p. 305. in Phthysicos medendi methodo est sequens: *adfluxus sanguinis copiosior ad pectus derivandus est per venesectionem, scarificationem, pediluvia,*

luvia, laxantia lenia. Cel. Schulzius in dissertatione de Phthisi §. 32. ita loquitur: „*Vesicatoria in hoc morbo aliqui non de nihilo habenda docent, ut & fonticulos; scilicet enim acria ex corpore educunt, & sic impediunt, ne ad pulmones delabi, & statum præternaturalem in iis inferre & augere possint.*”

§. LVIII.

*in tussi hu-
mida.*

In *tussi humida* purgantia largiter evacuantia, non alio scopo quam revulsorio, cum fructu propinquantur. Mucum enim, per pectus exitum quærentem, in alium aptiorem, locum excretionis revocant. Sic tussis convulsiva infantum optime infringitur, partim per laxantia, partim per vesicatoria furis adplicata.

§. LIX.

*in pleuri-
tide.*

Complures *pleuriticorum*, auxiliante Deo restitui vesicatoriis furis applicatis, præprimis ejusmodi ægrorum, in quibus aut catarrhus ulcerosus, ulcera crurum, scabies, erysipelas, aut alia mala cutis retrograda facta fuerunt. Deliria cum pleuritide complicata nullo medicamento citius tolluntur, quam vesicatoriis furis adpositis. Cel. Schulzius in dissertat. de dolore lateris p. 27. inquit: „*magnæ quoque efficacæ judicantur vesicantia tibiis, suadente Hippocrate adplicanda, post institutam venæsectionem, etiam ante illam spirandi scilicet ac sputi exscreandi, difficultate superveniente, quo tempore non leve auxilium tulisse & faciliorem iterum redditam respirationem expectorationem promovisse dicuntur.*” Baglivius facilis est in eis huic morbo adhibendis.

§. LX.

§. LX.

Infimi ventris etiam morbi ex congestionibus sanguinis originem ducentes revellentibus optime curantur. Quare pediluvia vel calor siccus pedibus admisus in cardialgia hysterica præsentaneum sæpe levamen ferunt; ubi pedes tactu frigidi apparent, certo certius indicant, congestiones versus locum affectum fieri. *in infimi ventris morbis.*

§. LXI.

De morbis retrogradis sive repulsis aliquid superest, quod commemorem. Rivinus quondam dissertationem de morbis retrogradis scripsit, quam anno 1697. Lindeman sub Præsidio Stahlî ventilavit, & p. 6. morbum retrogradum stricte loquendo definit, quod sit morbus, qui a corpore propulsus, stationem suam iterum relinquat, & ad interiora revertatur. *in morbis retrogradis.*

§. LXII.

Ex morbis vero, qui facile retrogrediuntur, vel vel ex peripheria corporis ad viscera repelli possunt, sunt vitia cutanea superficialia, v. g. maculæ hepaticæ, pustulæ, scabies, crusta lactea, gutta rosacea &c. vel profundius cuti inhærentes & exulcerantes, erysipelas, bubones, abscessus, tumores œdematosi, podagrici, gallici, ulcera, catarrhi ferofi. Huc pertinent quoque morbi exanthematici, petechiæ, purpura, variolæ, morbilli, male quoque curati fluxus sanguinis, lochiorum, mensium, hæmorrhoidum: item excretiones seri, salivæ, muci, urinæ & alvinæ. Omnia hæc vitia, excretiones *specialiter in vitiis cutaneis.*

tiones & morbi, quando præpostere tractantur & repelluntur, aut sine medela adhibita retrogrediuntur, variorum morborum auctores fieri possunt, & ad revocationem eorum media revellentia poscunt. Quæ si scite & convenienter adhibeantur, multis aliis remediis palmam præripiunt, & effectum exoptatissimum edunt. Sola enim interna & expellentia raro sufficiunt & scopum præfixum non semper attingunt: motum quidem concitant, & sanguinem commovent, congestiones vero magis in partem affectam pellunt, quam ad externum corporis habitum, nisi externis adminiculis revellentibus iis succurratur. Dantur & morbi intus aut in visceribus latentes, aut in massa sanguinea vel aliis humoribus hærentes, non retro pulsi, sed intus orti & generati, quos ut natura expellat, opus est; & in his naturæ labor levatur, mediantibus revellentibus, attrahentibus & allicientibus: exempla propositionem declarare & intelligibilem reddere possunt.

§. LXIII.

*In primis
eis quæ in-
fantes re-
center na-
tos adfli-
gunt.*

In infantibus recenter natis familiare quid est, clamor, inquietudo, & vociferatio ex torminibus: multa sæpe frustra adhibentur interna, donec tandem post aliquot menses natura achores, aut in toto corpore, aut in partibus quibusdam singularibus expellat, quibus expulsis tormina cessant. In hoc casu optime se habent, balnea ab interiori corpore ad circumferentiam allicientia & transpirationem promotiva, ex speciebus emollientibus parata, quæ quan-
do

do in tempore & a nativitate adhibentur, & alternis diebus per aliquot menses continuantur non solum tormina mitigant, sed & achores aliaque exanthemata ulcerosa præservant. Negligentia hinc obstetricum nostri ævi in adhibendis balneis, laudari non potest.

§. LXIV.

Variolæ sunt exanthemata cutanea, quæ per motum humorum expelluntur, & a massa sanguinea separantur. Natura sibi ipsi relicta, leviori modo erumpunt. Interim sæpe accidit, ut tarde in conspectum veniant, & retrocedere videantur. Quocirca plerique medici medicamentis internis earum expulsionem moliuntur: cum tamen, adhibito simul calore externo, potius repulsionem promoveant. Unicum vero vel duo ad extremas partes applicata vesicatoria, observato simul regimine temperato, plus præstant ad eas eliciendas, quam plurima molimina interna.

§. LXV.

Laudabilis quoque revulsionis species est, si variolæ ab insultu ad eruptionem usque ad pedes per intervalla lacte calido foveantur, ad faciem præcavendam, ne hæc copia variolarum obsideatur, nec formositas perdatur. Vesicatoria tempestive, aut ante morbi invasionem, aut in primo insultu applicata, præservant quoque viscera, ne variolis superfluis obducantur. Quæ vero revellentia in variolis profunt, hæc & in febribus petechialibus, purpuraceis, & aliis exanthematicis opem præstant non contemnendam.

In febribus petechialibus purpuraceis &c.

vianus Roboretus peculiarem edidit Tractatum de pediculari febre, anno 1592. Tridentini vagante, deque vesicatoriorum in ea potissimum usu. Et certo pedibus & suris apposita non modo congestiones a capite, deliriorum causam, revellunt, sed & petechias a visceribus ad circumferentiam alliciunt earumque retrogressum impediunt.

§. LXVI.

*In morbis
vere retro-
gressis.*

Nunc ad morbos vere retrogressos vel repulso revertor: de iis Moses WOLFF Judæus anno 1737. dissertationem inauguralem scripsit. De morborum inconsulta ratione suppressorum revocatione, in qua præ aliis observari merentur, scabies repulsa, fonticuli præclusi, fudor pedum repressus, podagra retro-pulsa: in quibus affectibus hinc inde revellentia commendat.

§. LXVII.

*In podagra
ac scabie re-
cedente
itemque su-
dore pedum
repulso.*

De podagra retro cedente in corpus b. Hoffmannus 1700. Dissertationem edidit in qua pag. ultima, legitur: optimum consilium esse, si ad pedes dolores revocari possint, quod frictionibus & pediluviiis perficiendum. De expulsionem morborum retropulso, caput therapev-ticum legitur in ill. Alberti Therapia. Fickius, Prof. Jenens. Dissertationem etiam scripsit de scabie retropulsa. Multa quidem exempla scabiei retropulsæ & morbo-rum exinde ortorum refert, & retrocessionis vias ve-nas statuit, de modo vero scabiem repulsam revocan-di, revellendi ac in cutem alliciendi, plane fileat. Cum tamen

tamen maximum in eo positum sit momentum, ut materia ad viscera repressa & ulcerosa impuritate viscera lædens revocetur in cribrum periphericum, & in locum pro excretionē tutiorem. Hoc autem solis medicamentis internis non semper obtinetur. Quid? quod, si externis adminiculis non succurratur, interiorum medicamentorum operationi, ut plurimum contrarium edunt effectum, & magis introrsum in locum affectum materiam ulcerosam congerunt, quam expellere debuerint. Ill. Alberti quidem l. c. §. 18. internis adjungit externa, dicens *ab extra denique modestæ frictiones, superficiei corporis cum linteis calidis inquinamenta hæc ulcerosa in peripheriam revocant.* At quia l. c. §. 13. magis allicientia, vesicatoria, rubefacientia, ut a vulgo commendata, immoderata & impetuosa rejicit, medicum, hinc dubium & nimis timidum reddere videtur, cum tamen potentiora revellentia hic optima, & sæpe præsentanei sint effectus. Sic memini expatris mei praxi virginis tenerioris constitutionis, ex pleuritide, hebdomade tertia adhuc non sine periculo laborantis, quæ cum manus ad pulsum explorandum præbebat, vestigia simul scabiei retropulsæ in conspectum dabat. Quamobrem materiam scabiosam, si non pro causa pleuritidis, cum ea tamen complicatam esse, optime judicabat pater: vesicatoria pro revellendi scopo ad furas commendabat, & brevi recursum & efflorescentiam pustularum scabiosarum, & cum hac restitutionem in integrum promovebat. Sudores pedum levioris momenti esse videntur. Repressi vel retropulsi tamen graviora mala inducere possunt. Media, quibus

bus sudores pedum restitui possunt, sunt revellentia, præcipue pediluvia, fatus & vapores calidi ex lacte vel decocto emolliente, pedibus admissi. Quibus multi hydrope, ictero, cardialgia, asthmate, colica laborantes restituti sunt. Natura enim semel, ad sudoris hujus alias consuetam excretionem allecta, non solum corpus ab humoribus in eo collectis per pedes & crura liberum reddit, sed & quantitatem materialium excrementitiarum per hoc cribrum evacuat, id quod ex odore sæpius nauseoso arguere possumus.

S. D. G.

